



Perspektiva den kuadro di Kombatimentu di Kriminalidat 2016-2021

Ministerio Públiko

Parkèt Prokurador-General

Kòrsou | Sint Maarten | Boneiru, Sint Eustatius & Saba

mei 2016

General

Pa medio di e perspektiva aki enkuanto kombatementu di kriminalidat, Parkèt di Prokurador General di Kòrsou, Sint Maarten, Boneiru, Sint Eustatius i Saba ta presentá su vishon relashoná ku mantenshon di òrdu pa e añanan benidero i tambe e manera kon pa yega na esaki. Kua ta e ambishonnan? Unda OM ta awe i unda e ke bai? Ki papel OM mes ke hunga den kombatementu di kriminalidat i ki ta su espektativa pa loke ta trata gobièrnu, partnènan di siguridat, organisashonnan sosial, siudadanonan, kompanianan i komunidad den su totalidat?

Un perspektiva no ta un plan di akshon sino un plan ku ta determiná un rumbo. E ta indiká e direkshon ku mester sigui pa yega na konkretisashon di un maneho i tambe na e akshonnan di e plannan di aña di e diferente parkètnan. E no ta duna tampoko un bista ekstenso enkuanto e maneho di tur e temanan ku OM ta aktivo ariba. E foko ta riba desaroyonan importante i innovashonnan ku OM huntu ku su partnènan i komunidad ke realisá durante e añanan benidero i tambe ta deliniá e strategianan pa medio di kua por kristalisá esakinan.

Durante e añanan ku a pasa OM a keda konfrontá ku un oumentu di investigashon di kriminalidat ku a tuma formanan pisá i dañino. E menasanan salí for di organisashonnan (internashonal) di krimen organisá ta enormemente grandi, pa no papia mes di mas grandi ku nunca. Na mes momento, pa loke ta trata infrastruktura i institushon, e paisnan ainda no ta sufisientemente kapasidat pa e tipo di kriminalidat aki ku hustamente ta buskando e eskala vulnerabel di demokrasianan hóben i sosiedatnan chikí pa akomodá. Esaki ta kondusí na violashon di integridat i liñanan di kiebro den estadonan di derecho. Fuera di e formanan di kriminalidat ku ta trasendé pais, esunnan di impakto haltu i tambe esunnan ku frekuentemente ta tuma lugá, sigur sigur ta fuentenan di hopi prekupashon, pasobra nan ta di influensia direkto riba e sentido di (in)seguridat di siudadano- i impresarionan.

Pa duna un kontesta adekuá mester bisa ku kaminda kriminalidat a sigui desaroyá, mantenshon di derecho no a sa di organisá su mes sufisientemente ainda durante e añanan ku a pasa. Ta mira e parti Karibense di Reino Hulandes te ainda komo un nèshi di krimen pisá ku tur e konsekuensianan negativo mará na esaki. Nos niun no por pèmití pa e situashon aki dura pa tempu largu. Poblashon i sosiedat mester por tin e konfiansa ku na un manera adekuá ta kombatí tantu e kriminalidat ku tin un influensia grandi i direktamente riba e sentido di siguridat, komo esun ku ta ménos visibel pero ku por lo ménos ta di un forma mesun dañino di kriminalidat. P'esei intervencionnan efektivu ta nesesario. Nan mester ta visibel i notabel pa e víktima, malhechor i e komunidad den su totalidat.

Leinan penal ta aportá na esaki pa medio di korekshon i desaprobashon di komportashon kriminal i tambe pa medio di rekuperashon di e daño sufrí. Sinembargo e instrumento aki ta di índole represivo: pa definishon 'e ta bini despues' pues p'esei

mes e ta limitá pa loke ta trata prevenshon di kriminalidat. E ekspektativanan pa loke ta trata intervenshon penal, no mag ta muchu haltu. Leinan penal no ta kapas pa solushoná tur problema di siguridat. P'esei banda di regla asuntunan penal ta deliberá i kolaborá ku partnernan pa konhuntamente yega na strategianan di intervenshon i prevenshon. Den esaki OM ta mira ku e tin e ròl di inisiadó.

E nesidat i urgensia pa invertí den un desaroyo kontinuo kualitativo i organisatorio di mantenshon di derecho ta hopi haltu i por sinti e nesidat aki riba tur tereno. Ta na interes di kada pais apart pero tambe pa Reino Hulandes den su totalidat, pa posishoná den e diferente paisnan un kadena di mantenshon di derecho anchu, bon organisá, efikas i profeshonal ku ta kapas i motivá pa ataká tur forma di kriminalidat. OM ta konsiderá esaki su tarea i responsabilidat pa tuma inisiativa den esaki. Den kuadro di esaki OM ta konta ku kolaborashon di partnernan, di gobièrnu i di komunidad mes tambe. Ta sigui ku tratamentu di e liñanan prinsipal di e tres pilarnan stratégiko.

1. Ambishon i strategia

Ambishon di OM ta pa aportá efektivamente pa yega na un sosiedat sano i hustu i tambe ofresé un fuerte garantia pa yega na un estado di derecho demokrátiko i íntegro. Apesar di tur esfuerso hasí durante añanan ku a pasa ainda no a logra e resultatonan deseá. Esei ta e realidat inkómodo ku mester di atenshon. OM su empeño ta pa bini ku un cambio definitivo i e pregunta konkretu ta: Kon?

E strategia di OM ta basá riba tres pilá:

- I. desaroyo (kontinuo) di un aserkamentu íntegral,
- II. mehorashon di konekshon i komunikashon ku sosiedat, i
- III. desaroyo (kontinuo) di OM komo un organisashon profeshonal.

E akshonnan ku konkretamente por aportá na ehekushon di e strategia aki, ta deskribí den e plannan di aña di e diferente parkètnan. Di e manera aki tin espasio pa e trabou na midí nesario pa kada pais, evaluashon annualmente di pais i tambe posibilidat pa èikmentu un bes mas.

I. [desaroyo \(kontinuo\) pa un aserkamentu integral](#)

logro i aktuashon konhuntamente

E aktual grandura i organisashon di e servisionan di rastreamentu den kadena hudisial no ta suficiente pa por enfrentá kriminalidat. Pa e motibu aki no por spanta kriminalnan sufisientemente i mayoria bes nan ta sigui hasi loke nan ke trankil asina pasobra nan no ta sinti e rosea pisá di OM riba nan. Sinembargo ta un echo inevitabel ku e rekursionan disponibel pa rastreo i persekushon ta skars. Realidat ekonómiko di paisnan lo no trese

kambionan digno di menshon den e situashon aki. P'esei punto di salida ta ku mester hasi mas pa medio di e mesun rekursonan (tantu pa loke ta trata e parti di personal komo esun finansiero). Esaki ta nifiká ku mester desaroyá un strategia pa medio di kua ta engrandesé e forsa di e sistema di mantenshon di órden públiko strukturalmente riba tur área di trabou, tantu den término represivo komo preventivo.

Intervenshonnan penal tin un efekto sosial muchu mas grandi ora nan no ta tumando lugá isolá, pero sí ora nan ta parti di un strategia anchu i kolektivo di e ret di siguridad. E asina yamá aserkamentu integral aki ta enserá ku organisashonnan di diferente disiplina ta plantia meta- i ambishonnan komun i ta traha mutuamente na realisashon di esakinan. Konkretamente bisa; esaki ta nifiká ku mester hasi uso di otro su ekspertisio, kapasidat i /òf kompetensianan pero tambe kompartí informashon. Dependé di e problema e instansianan, ku ta kapasidat pa tuma akshon, ta organisá un enkuentro i konhuntamente nan ta stipulá e strategianan di intervenshon i prevenshon ku ta mas efektivo i ku tambe ta duna mas perspektiva. Pues un aserkamentu integral ta un kombinashon di kapasidat, kalidat, diversidat, selektividat i un embolbimentu di otro strategianan ku no ta solamente detekshon i persekushon penal.

E ret di siguridad no ta konsistí solamente di partnernan di kadena hudisial, sino tambe di gobièrnu, di e diferente servisionan di mantenshon di órden públiko i tambe di tur posibel partidonan (semi) públiko i privá di den komunidad. Hustamente e kolaborashon públiko-privá i e partisipashon di e partnernan no konvenshonal ta hasi e aserkamentu integral aki unu fuerte. P'esei e mehorashon nesesario di e konekshon aki ku komunidad ta forma e di dos pilá stratégiko.

Balor agregá di un aserkamentu integral ta sintá den su karakter híbrido. Pa medio di esaki hopi mas posibilidat por nase pa por sigui reakshoná adekuadamente riba komportashon kriminal, òf hustamente tambe pa evitá tal komportashon. Por pensa riba konfiskamentu di kapital kriminal, mantenshon pa medio di medidanan i konstrukshon di bareranan atministrativo, riba empeño di timnan multidisiplinario, modalidatnan di likidashon i redukshon di e ínfluks di violador pa medio di prevenshon, resosialisashon, poskuido i embolbimentu di partnernan sosial. For di e konvikshon ku mantenshon di órden no ta alkansabel ku solamente intervenshonnan penal so, lo sigui konta e añanan benidero ku disponibilidat di e intervenshonnan alternativo i tambe lo sigui buska partnernan nobo i kapas.

E yabi pa un aserkamentu integral eksitoso ta enserá; un disponibilidat optimal i utilisashon di kapasidat, ekspertisio, kompetensia- i informashonnan di e partnernan. Esaki ta pidi pa tin un bon kolaborashon i un bon relashon di tur dos banda. Un aserkamentu integral ta eksigí pa tin un kompromiso enkuanto e meta- i ambishonnan, disponibilidat, energia, transparensia i fleksibilidat di tur partner enbolbí. Burokrasia, sintimentunan teritorial i agèndanan dòbel ta traha kontra-produktivo. Esensial ta un sintimentu di responsabilidat kompartí, konfiansa mutuo, sintimentu di urgensia i un

pensamentu di 'nos'. OM enfátikamente ta habrí pa interes di e partnernan i ke pa nan prioridat- i strategianan ta di influensia p'e.

Aserkamentu pa medio di e ret integral ta pidi pa un kòntrol konsekuente i tambe pa un responsabilisashon di tareanan pa ku otro. Mester marka e resultadonan optené. E kréditonan ei ta konta pa tur partner ku ta partisipá. Mester deliñá e ròl eksakto i tambe e posishon di e partnernan ku ta forma parti di e aserkamentu integral. Pa yega na e fase aki, rekonosementu di posishon, interes i kapasidat ta esensial. Esaki na su turno ta kondusí na un sentido di realidat i kompreshon di tur banda pa por evitá desepshon i frustrashon. Te na e momento aki ta OM tin e mando pa loke ta trata; desaroyo di un maneho integral, buskamentu di partnernan adekuá i formulashon di metanan komun. OM lo hasi su máximo esfuerso pa, huntu ku e partnernan, tuma e ròl di pionero aki.

II. Mehорashon di kontakto i komunikashon ku komunidad

Informá i mobilisá

No por alkansá un kambio duradero pa yega na un komunidad mas seif i mas hustu ku ménos kriminalidat i mas integridat, sin partisipashon enfátiko di e komunidad ei mes. Mester kibra e sírkulo visioso di klientismo i di interes propio pa medio di mas konfiansa den hustisia i lei. Kasi tur profeshonal ku ta traha riba e tereno di anti-korupshon ta insistí riba e ròl stratégiko di prensa i di e 'civil society' den kuadro di e kambio kultural aki. Desisivamente ta, ku mester krea un konsenshi kolektivo i un opinion públiko ku ta kondusí na un kompromiso di akshon di siudadano, kompania, organisashonnan sosial i di media. Di e manera aki komunidad por manifestá su mes komo un partner esensial pa yega na e kambio di un 'culture of legality and justice', kaminda ta redusí falta di interes, resignashon i sinismo den pueblo ('hasi manera no sa di nada', haña kriminalidat 'normal' i no tin 'kerementu' mas den servisionan di mantenshon di derecho) i ta desaprobá komportashon kriminal kolektivamente i por papia atrobe di noshon di norma i balornan kompartí.

Esaki ta un manera alternativo, banda di e intervenshonnan penal, pa medio di kua por redusí kriminalidat i alkansá e 'big fishnan' ku ta debilitá komunidadnan den nan basenan sosial ku ainda ta demasiado anchu. Servisionan di mantenshon di derecho so no por hasi esaki. Si komunidad mes no asumí su responsabilidat i bai kontra di korupshon i akshonnan ilegal, intervenshonnan penal lo ta di efekto temporal i poko despues lo mira atrobe otro hungadónan riba e senario. Hustamente e kolaborashon pa aserká un asuntu den dos direkshon, pues un banda pa medio di mantenshon penal i e otro banda pa medio di oumento di preshon salí for di den komunidad, ta ofresé e garantia di mas haltu pa yega na resultadonan duradero.

E kambio aki no ta posibel sin un base di sosten anchu pa OM, e diferente servisionan di mantenshon di órden públiko huntu ku nan manera di funshoná. E base di sosten aki ta konsistí entre otro di konfiansa den integridat, perisia i kompreshon pa e eskoho- i prioridatnan hasí. Komunitat huntu ku su diferente gruponan di poblashon, organisashonnan, institushonnan i empresanan ta e 'stakeholder' di e estado di derecho i tambe di OM ku mester protehá e estado di derecho aki. Komunitat tin un interes klaritu pa medio di servisionan ku ta funshoná bon i p'esei mes en prinsipio lo e ke sostené nan. Sinembargo un base di sosten no ta un asunto ku ta bini di su mes.

OM ta atmití ku su base di sosten a eroshoná i ku e ta insufisientemente presente na e momento aki. Drecha i amplia e base ta un prioridat. Esaki lo kondusí na un relashon muchu mas mihó ku komunitat i tambe na mas sosten aktivo i aporte di e diferente partidonan for di den komunitat. E fenómeno aki por desaroyá den un forsa importante kaminda faktornan kriminológiko, persona- i komportashonnan ta manifestá nan mes. Sosiedat sivil ta eksigí di e manera aki su lugá i lo asumí su responsabilidad. E forsanan positivo aki dirigí riba lèi i hustisia ta mas ku bon biní i mester tesorá i hasi bon uso di nan: komunitat mes mester ta parti di un asina yamá 'coalition of the willing'

Pa aktivá e kontra-forsanan, OM lo mester informá i mobilisá komunitat kontinuamente. Fuera di esei ta di importansia pa buska figuranan klabe ku outoridat i liderasgo moral riba tereno di norma i balor, integridat, formashon i edukashon. Por pensa riba iglesianan, skolnan, sentronan di bario i otro organisashonnan básiko i lokal na nivel di 'grass-root', manera organisashonnan di trabounan boluntario, klupnan di deporte i komiténan di den bario. Konsiderando e impaktonan ku regularmente ta tuma lugá den komunitat komo konsekuensia di deliktonan gròf òf violashonnan di integridat, ta bira motibunan pa tuma pasonan konkretu pa aserká e persona-òf instansianan aki. Dor di embolbí nan komo parti di e tópikonan di siguridat i di e ret, lo alkansá un efekto sosial konsiderablemente grandi.

Embolbimentu di komunitat mester tuma lugá saliendo for di e pensamentu ku OM tambe ta di sumo importansia pa komunitat; no solamente pa duna satisfakshon, sosten, protekshon i kompreshon, pero tambe pa asuntunan práktiko i konkreto manera atenshon dirigí riba problemátiko di bario, organisashon di oranan di bishita liber, dunamentu di informashon na skolnan, ofisina- òf sentronan di bario, posibilidat pa mèldu krimen na un manera anónimo, etc. Esaki ta pidi pa un ròl i aktitut nobo di OM i su kolaboradornan. Lo amplia mas tokante di esaki den kapítulo 2.

OM ta invertí fuertemente den splikashon pro-aktivo i komprendibel enkuanto su aktuashon- i desishonnan i tambe di e manera atraktivo ku lo E trese su mensahe dilanti tantu den sala di korte komo pafó di esaki. Un bon komunikashon ta e vehíkulo nesario pa medio di kua por alkansá i dirigí palabra na komunitat, pa asina amplia e base di sosten. Por hasi esaki pa medio di asuntunan (visualmente) konkreto òf

seshonnan di tema, pero tambe por hasi esaki sin un motibu direkto. Por pensa na duna informashon di fondo tokante trabou i organisashon di OM via media sosial, organisamentu di workshop i dianan habrí, tambe pa medio di duna informashon na skolnan, sentronan di bario òf kualke otro kaminda den komunidad.

III *Desaroyo (kontinuo) di un OM profeshonal*

Perisia, eksaktitut, efisiensia i transparensia

Pa logra tur e ambishonnan stipulá ta eksigí hopi di tur e instansianan embolbí, esaki ta konta pa OM mes tambe. Desaroyo (kontinuo) di un organisashon-OM fuerte, profeshonal i moderno ku ta kapas na duna ehekushon na akshon- i strategianan, ta forma e di tres pilá stratégiko. Mester sigui ku profeshonalisashon di e organisashon interno i di e prosesonan di trabou a traves di henter liña: di sosten atministrativo te na òfisirnan di hustisia, i di eksplotashon di empresa te na informashon di prensa. E produkto klásiko mester ta bon i p'esei mes un kantidat di kompetensia di fondo mester ta na òrdu.

✓ **Perisia**

E kalidat hurídiko di e intervenshonnan hasí ta krusial pa e legitimashon i efektivitat di aktua di OM. P'esei mester di profeshonalnan di ekselente kalidat ku ta kapas pa tantu na komienso di e proseso penal komo durante di su desaroyo tuma e desishonnan korekto i sòru pa e desishonnan ei keda ehekutá na un manera adekuá. Esaki ta pidi pa e kolaboradornan tin kompetensianan altamente desaroyá. Ta mas ku klaro ku e profeshon hurídiko klásiko mester ta na òrdu, pero tambe ku kada bes atrobe mester hasi uso di e kapasidat i ekspertisio korekto i papia di sosten kolegal. Mester pensa riba (organisamentu di) dunamentu di krítika, riba evaluashon, intervishon i okupashon múltiple durante e seshonnan. Un aktitut habrí di koleganan ta nesesario i tambe un embolbimentu di esnan ku ta duna guia.

A kuminsá ku e promé desaroyonan riba e tereno aki. Por ehèmpel, un sentro di konosementu- i di kalidat lo bai atendé ku inventarisashon, kordinashon i registrashon di tur estudio, training i kurso. A repartí un kantidat di forma di kriminalidat entre e parkètnan ku a haña nombramentu di spesialisashon di fondo, a start ku un propio estudio di òfisir i a desaroyá un método pa medio di kua via asuntunan penal por buska kasonan vulnerabel na un manera aktivo di manera ku por reflekshoná i aktua a base di esakinan.

✓ **Eksaktitut**

E índole i urgensia di e trabou di OM ta urgi pa traha ku mas eksaktitut posibel. Ta trata por sierto di aktonan impaktante i di desishonnan ku ta hasi impakto fuerte riba e siudadano(nan) individualmente i tambe riba e komunidad den su totalidat. Esaki ta nifiká ku kontinuamente mester por tin konsiderashon di interes minusiosamente,trato

korekto, un maneho di komunikashon i prensa adekuá, un atministrashon i korida di fail transparente i tambe finalisá petishonnan internashonal den kuadro di asistensia hurídiko na un manera adekuá.

Dunamentu di asistensia na víktimanan ta un prioridat; pa OM esaki no ta un akshon insignifikante sino unu signifikante. Tambe lo konsentrá tratamentu i registrashon di petishonnan internashonal enkuanto asistensianan hurídiko ku ta drenta i sali na un Internationaal Rechtshulp Centrum (IRC) kapasitá. Finalmente ta pone èkstra atenshon na tratamentu di korespondensia, di manera ku kontestamentu di karta dor di e persona apropiá, ta tuma lugá na tempu.

✓ **Efisiensia**

Sospechoso- i víktimanan mester por konta ku un tratamentu rápido di nan kaso, pa asina mas lihé posibel, kada ken sa unda nan ta pará. Tambe mester hasi e tareanan di ehekushon na un manera adekuá: un mantenshon di derecho basá riba kredibilidadat ta kai i lanta ku ehekushon di kastigu i medidanan imponé na un manera efektivu, lihé i kompletu. Tambe mester desaroyá posibilidatnan di prosesamentu di kaso mas simpel, mas lihé i barata manera prosesamentu di kaso dor di OM, aserkamentu ZSM, huisio di (super) urgensia, mediation, intermediashon reparativo, Hura, Jasap, etc

Un organisashon interno di OM ku ta funshoná optimalmente ta un kondishon impresindibel pa realisashon di un oumento di efisiensia. E departamentu ku ta regla e asuntunan interno ta hunga un papel krusial di fasilitador den esaki. Ta nifiká pues ku e departamentu aki ta na servisio di un ehekushon perfekto di e proseso primario. Ku e mester sòru pa institushon i aselerashon di prosesonan (logístiko) di trabou, pa un bon maneho di personal, pa tin informashon di management i di guia aktualisá i metikuloso disponibel, un ICT moderno, etc. Pa un efekto mas amplio, ta pone énfasis riba kolaborashon ku e eksplotashon di empresanan di e partnernan.

✓ **Transparensia**

OM mester splika kiko e ta hasi i e dikon E ta hasi esakinan, pues E mester ta transparente i kla enkuanto su sistema di trabou i e konsiderashon- i e desishonnan ku E ta tuma. Mas transparensia ta kondusí na mas komprension i aseptabilidadat. Esaki ta eksigi pa tin un bon komunikashon i huntu ku esaki uniformidat entre e parkètman, di manera ku OM ta bon kla den su hasí. Komunitat mester sa i komprondé kiko OM ta para p'è i kon e ta ehekutá su trabou.

Un parti importante pa mehorá e grado di transparensia ta konstatashon i publikashon di e instrukshon- i direkshonnan pa loke ta trata e área di trabou di OM i su partnernan. Huntu ku esaki e desaroyonan pa un maneho di prensa i komunikashon pro-aktivo i asesibel ta un prioridat krusial. Ta konsiderá hibamentu di palabra, dunamentu di informashon i mantenshon i ekspanshon di retnan di kontakto komo un profeshon apart i un 'full-time job'.

2. Ròl i Tarea di OM

OM ta dirigí mas ku ántes eksternamente. For di ántes E tabata enkargá pa lèi ku mantenshon penal di órden hurídiko i ta e úniko instansia ku ta outorisá pa trese sospechosonan dilanti hues di korte penal. Sinembargo e ambishonnan ta yega mas leu ku e aktual konyutura di tempu, ku ta karga awa hiba laman pasobra kriminalidat a komodá profundamente den komunidad i tin kuestion ku baho mundu a entrelasá ku e mundu diario. OM ta deseá, mirando e posishon krusial ku e tin, pa desaroyá pa medio di e ret di siguridat inisiativanan hanchu i kuminsá ku un kontra-atake. Ku yudansa di strategianan inovativo OM ke, huntu ku e partnernan, gobièrnu i komunidad, hiba un bataya duradero kontra kriminalidat durante e añanan benidero. Esaki ta pidi pa un otro ròl i sistema di traha, un posishon di informashon masha fuerte mes i un foko riba un kantidat di tarea spesífiko.

Ròl nobo

OM lo mester deskubrí su mes atrobe pa por dal pasonan mas dilanti enkuanto e modelo klásiko ‘vertikal’ di un instansia magistral ku ta dirigí investigashonnan i ta tuma desishon tokante persekushon, ku foko riba e kaso. Mester desaroyá un ròl ‘horizontal’ nobo, ku ta dirigí riba realisashon di efektonan mas anchu i duradero. Pa medio di e ròl nobo aki OM ta mas orientá riba ambiente i ta pará den sentro di komunidad. OM ke ta un partner di siguridat asesibel, ku komo partido ekivalente ta buska deliberashon i kolaborashon ku partidonan relevante pa konhuntamente yega na strategianan di intervenshon i prevenshon. Ta trata aki di aspektonan manera legimitashon, base di sosten, visibilidat, transparensia, asesibilidat, interkambio di informashon, ret di partnernan, solidaridat i direkshon eksterno. Tin un relashon direkto entre e asuntunan aki i e efektividat total di e ehekushon di OM su tarea. E presensia òf ousensia di e elementonan aki ta dependé desisíivamente di e kultura di OM i e komportashon i aktitut di su kolaboradornan.

Ora ta ehersé e ròl klásiko i vertikal, e kancha di wega ta konosí i familiar. E ròl nobo i horizontal mester bira ainda parti di OM i ta un proseso (di desaroyo) a base di ‘hasi pa siña’ i ‘trial and error’, pa medio di kua lo deskubrí kon alkansá adelanto pa medio di gatia promé ku kana. Pa OM esaki ta un di e desafionan pa pone e dos ròlnan aki (orientashon riba kaso i riba ambiente) di tal manera den relashon i balans ku otro pa nan tur dos re-enforsá otro pa asina krea un repertorio mas hanchu na aktividat i efektividat. Kompetensianan importante pa kolaboradornan di OM ta; embolbimentu sosial i sensitividat, boluntat pa traha huntu, curiosidat, kurashi, perseveransia i orientashon riba resultado.

Puesto di informashon

Akseso na bon informashon ta esensial pa e kalidat sosial ku OM ke ofresé. Pa logra esaki ta nesesario pa OM i su partnernan ta bon ankrá den komunidad. Mester konosé i komprondé e konteksto sosial; mester sa kiko ta pasando i e pakiko esaki ta pasando.

OM i su partnernan mester ta den posishon di bon informashon i kapas pa analisá i prosená esakinan pa asina yega na strategianan di intervenshon i di prevenshon. Despues, a base di e konosementu aki, por kuminsá hasi uso i dirigí e kapasidat i ekspertisio korektamente. Den un aserkamentu integral no solamente kada partner mester tin nan puesto di informashon na òrdu, pero nan mester kompartí i diskutí esaki tambe enfátikamente.

Esensial ta pa OM i e partnernan informá otro den e sentido mas amplio di palabra tokante e faktor- i aktor nan ku ta mishi ku siguridat i integridat di komunidad. Ta trata aki por ehèmpel di informashon tokante e índole di e organisashonnan kriminal aki i nan manera di operá (infrastruktura, partisipantenan etc.) e efektonan sosial ku esakinan tin, tokante resultado di investigashon di fenómeno i e proyektonan pa medio di kua por studia i komprondé e sektornan aki, nan modus operandi i e desaroyonan di krimen nobo ku ta lanta, pa asina por señalá nan na tempu, tokante señalnan kriminológiko konkreto ku ta sali for di den komunidad, personanan klabe i e áreanan. Tin tur e informashonnan aki kaba, pero plamá den diferente parti i na diferente nivel. Riba e punto aki por tin un bon adelanto. Fortifikashon di e posishon di informashon, mantenshon sistemátikamente i partisipashon di esaki strukturalmente ta un 'must' pa tantu OM komo su partnernan.

Foko

Aktuashon di OM semper mester ta visibel i notabel den komunidad. Esaki ta nifiká ku e prioridat- i aksentonan di OM den su ròl klásiko, kontinuamente mester ta den relashon ku e realidat sosial. Esaki na su turno ta pidi pa selektividat: pues pa skohe pa kasonan ku tin mas prioridat i pa intervenshonnan ku tin un máksimo efekto den komunidad. Den kuadro di e aktual situashon di kriminalidat den e paisnan, OM lo mester pone énfasis den e añanan benidero, tantu den e ròl di kasonan komo esun nobo di relashon ku e realidat sosial pa un aserkamentu di tres forma di kriminalidat: ku ta kriminalidat ku ta mina i alabes ta pasa frontera, kriminalidat di Impakto Haltu i kriminalidat frekuente. Banda di e tres forman aki OM ke traha seriamente riba kitamentu di kapital prosedente di kriminalidat.

E kriminalidat ku ta mina pais i pasa frontera ta forma un menasa grandi pa e estadonan di derecho demokrátiko ku ainda ta hoben, di eskala chikí i ku pa e motibunan aki mes ta vulnerabel. En partikular, e laso entre baho mundu i e mundu di tur dia ta di gran prekupashon i tin un enorme impakto sosial. Kombatimentu fuertísimo di e forma di kriminalidat aki ta prioridat number un. Resultadonan optené ta proba ku ta kue e kriminalnan aki, ku ta kibra nan forsa i prestigio i ku pues no ta vale la pena kometé krimen. Parkèt di PG tin un papel inisiativo pa loke ta e aserkamentu aki pa medio di un programma integral ku mester organisá na nivel di pais i di isla i ku ta di karakter inovativo, alternativo i multidisiplinario. Rekursonan èkstra ta disponibel pa kapasidat agregá i perisia spesialisá.

Krimen di Impakto Haltu tin hopi influensia riba e sentido di siguridat di siudadanonan. Komunidat ta konta ku protekshon i ta anhelá pa servisionan aktuá enérgikamente; na satisfakshon, na tuma represaya, na desmantelashon i spantamentu. Esaki ta eksigí un rastreo lihé i efikas, umento di riesgo di detenshon, tratamentu rápido di kasonan, eksiguimentu di kastigunan di libertat ekstense i un strategia di komunikashon pro-aktivo. Na mes momento ta invertí den un aserkamentu integral di prevenshon i di evitashon di residivismo por sierto serka hóbenan i adultonan hóben, pa medio di por ehèmpel e aserkamentu Top C. E strategia aki ta dirigí riba aktuashon na tempu i prevenshon di eskalashon.

High Impact Crimes hebben een grote invloed op het veiligheidsgevoel onder burgers. De samenleving rekt op bescherming en snakt naar een daadkrachtig optreden van de diensten; naar genoegdoening, vergelding, onschadelijkmaking en afschrikking. Dit vereist snelle en doelmatige opsporing, verhoging van de pakkans, een voortvarende behandeling van zaken, het eisen van lange vrijheidsstraffen en een proactieve communicatiestrategie. Tegelijkertijd wordt 'aan de voorkant' geïnvesteerd in een integrale preventieaanpak en het voorkomen van recidive, met name bij jeugd en

Kriminalidat ku ta aparesé frekuentemente, por ehèmpel den barío, ta un molèster den komunidat. Aunke e forma aki no ta pertenesé na e fenómeno di mas pisá di kriminalidat, hustamente pa e konfrontashon públiko direktamente den e ambiente di biba e ta sigur sigur un fuente di hopi intrankilidad i malestar pa siudadano- i empresarionan. E ta afektá kalidat di bida i p'esei aserkamentu di esaki tin prioridat. Puntonan di esensia ta prevenshon i aplikashon di un maneho di aktua robes, sinti' é un bes. E servisionan mester ta visibelmente presente, sa kiko ta pasa den barío i tambe ken ta e figuranan klabe (pa medio di por ehèmpel community en hot spot policing). Interveshonnan ta sòru pa un afirmashon di norma konkretu. Un ehekushon lihé di e interveshonnan aki ta nesario pa un korekshon visibel enkuanto komportashon kriminal.

Finalmente kitamentu di kapital prosedente di kriminalidat ta un punto di enfoke durante e añanan benidero. Saliendo for di e echo ku kasi tur forma di kriminalidat ta dirigí riba ganamentu di plaka i for di e konvikshon ku krimen no mag paga, lo mishi ku kriminalnan na nan punto mas vulnerabel, ku ta nan pòtmòni. Dor di kita fortuna atkirí ilegalmente ta kita e probecho aki na un manera alternativo i na fabor di e paisnan na un manera relativamente lihé i simpel. Ademas ta duna un señal importante na malhechornan, víktimanan i komunidat den su totalidat. Ta kibra un status kreá ku plaka kriminal c.q. ròl di ehèmpel públikamente i ta redusí sintimentunan kolektivo di inhustisia, di insiguridat i di peliger. Ta aktua visibelmente i komunidat mester nota ku ningun hende no ta intangibel. Kitamentu di kapital kriminal no ta un tarea sekundario pero un tarea núkleo di OM ku mester ehekutá pa ekselensia integralmente i ku hopi diferente partner.

Epílogo

E perspektiva aki tin komo meta pa informá e propio organisashon di OM, e diferente partnernan, gobièrnu i komunidad tokante e manera ku OM huntu ku nan tur tin pensá pa kombati kriminalidat durante e añanan benidero. Pa logra esaki ta pone énfasis riba e desaroyo- i innovashonnan ku, segun OM, mester tuma lugá den tur área pa asina yega na un komunidad mas sano i hustu ku ménos kriminalidat i mas integridat. OM ta spera ku e direkshon nobo aki lo toka su kolaboradornan i lanta entusiasmo, kreatividat, plaser di trabou i lo kontribuí na un impulso nobo.

E dokumento aki no mag bira un 'kos' pa hinka den lachi, e mester sirbi di inspirashon pa konhuntamente aportá na un kambio di direkshon pa asina yega na un 'culture of legality and justice' den e paisnan. E ehekushon práktiko di esaki ta eksigí trabou na midí pa kada pais i deliberashon intensivo i kolaborashon ku partnernan, ku gobièrnu i instansianan privá di den komunidad. OM gustosamente ta tuma e inisiativa i lo stimulá, promové i fasilítá kaminda por i ta hasi alabes un apelashon riba tur partido. Mester bisa; logra un kambio di kultura ta tarea di henter un komunidad i un responsabilidad kompartí.